

“Йўлқурилиш” АЖда харидларни амалга ошириш

ТАРТИБИ

Мазкур Тартиб Ўзбекистон Республикасининг 2021 йил 22 апрелда қабул қилиган “Харидлар тўғрисида”ги ЎРҚ-684-сонли Қонуни (Қонун ҳужжатлари маълумотлари миллий базаси, 23.04.2021 й., 03/21/684/0367-сон) ва харидларни амалга ошириш соҳасидаги бошқа қонун ҳужжатларига (бундан буён матнда қонунчилик деб юритилади) мувофиқ “Йўлқурилиш” АЖда (бундан буён матнда қорхона деб юритилади) харидларни (бундан буён матнда харид деб юритилади) амалга ошириш тартибини белгилайди.

I. Умумий қоидалар

1. Қонунчиликка мувофиқ қорхона корпоратив буюртмачи бўлиб ҳисобланади.
 2. Харидларни амалга оширишнинг асосий принциплари қуйидагилардан иборат:
 - касбий маҳорат ва масъулиятлилик;
 - асосланганлик;
 - молиявий маблағлардан фойдаланишнинг оқилоналиги, тежамкорлиги ва самарадорлиги;
 - очиклик ва шаффофлик;
 - рақобат ва холислик;
 - мутаносиблик;
 - харид тизимининг ягоналиги ва яхлитлиги;
 - коррупцияга йўл қўймаслик.
- Юқорида санаб ўтилган асосий принциплар харид жараёнининг барча босқичларида қўлланилиши керак.

3. Қорхонанинг, харидлар электрон тизими операторининг, ихтисослашган ташкилотнинг, эксперт ташкилотининг мансабдор шахслари ва бошқа ходимлари, шунингдек харид комиссиясининг аъзолари ҳамда экспертлар харидларни амалга оширишда ўз иштирокидаги харидларга доир битимнинг натижаси бўлган ҳар қандай шахсий фойдани бевосита ёки билвосита олиш ҳуқуқига эга эмас.

Ушбу банднинг биринчи хатбошисида кўрсатилган шахслар:

— харидларни амалга оширишда бошқа харидлар субъектларининг ҳуқуқлари ва қонуний манфаатларига зарар етказадиган ҳамда ушбу ҳуқуқлар ва қонуний манфаатларни чеклайдиган ҳар қандай манфаатлар тўқнашуви кўринишларининг олдини олиши шарт;

— ҳар қандай эҳтимол тutilган, тахмин қилинаётган ёки мавжуд манфаатлар тўқнашуви ҳақидаги ахборотнинг ошқор қилинишини кафолатлаши керак.

Мавжуд бўлган ёки тахмин қилинаётган манфаатлар тўқнашуви тўғрисида хабар топган, ушбу банднинг иккинчи қисмида кўрсатилган шахслар бу ҳақда бевосита раҳбарини ҳамда харидлар соҳасидаги ваколатли органни хабардор этиши шарт.

Манфаатлар тўқнашуви мавжудлиги тўғрисидаги ахборотларни олган раҳбар унинг олдини олиш ёки уни бартараф этиш бўйича ўз вақтида чоралар кўриши ва харидлар соҳасидаги ваколатли органни кўрилган чоралар тўғрисида хабардор қилиши шарт. Харидлар соҳасидаги ваколатли орган манфаатлар тўқнашуви мавжудлиги тўғрисидаги ахборотни олгач, давлат назоратини амалга оширувчи давлат органларига тегишли ахборотни киритиши шарт.

4. Корхонанинг ёки харидлар электрон тизими операторининг ходими ўзининг харидлар ижрочилари ёки ҳар қандай бошқа шахс билан муносабатларида, агар бундай ахборотни ошкор этмаслик давлат хавфсизлиги манфаатларини химоя қилиш учун зарур бўлса ёки агар бундай ахборотнинг ошкор этилиши қонунчиликка зид бўлса, уларга риоя этилишини таъминлашга монелик қилса, харидлар субъектларининг қонуний манфаатларига зарар етказса ёхуд инсофли рақобатга тўсқинлик қилса, агар харидлар соҳасидаги ваколатли орган бундай ахборотни ошкор этиш тўғрисида қарор қабул қилмаса, ҳеч бир ахборотни ошкор этишга ҳақли эмас.

Харидлар соҳасидаги ваколатли орган бундай ахборотни ошкор этиш тўғрисида қарор қабул қилган тақдирда, ушбу қарорнинг шартларига риоя этилади.

Харидлар иштирокчиси харидда иштирок этиб, унинг харидда иштирок этиши билан боғлиқ таклифда ўзи кўрсатган барча маълумотларнинг эълон қилинишига розилик билдиради.

5. Корхона:

— мустақил равишда ёки ихтисослашган ташкилотни жалб этган ҳолда товарнинг (ишнинг, хизматнинг) бошланғич нархини белгилаш, бундан қонунчиликда белгиланган ҳоллар мустасно;

— харидларни амалга оширишда ўз расмий веб-сайтига ёки ўзининг юқори турувчи органи расмий веб-сайтига, шунингдек оммавий ахборот воситаларига эълон жойлаштириш;

— харидлар иштирокчиларидан энг яхши таклифларни танлашни (бундан буён матнда танлаш деб юритилади) ва тендерни ўтказишда харидлар тўғрисидаги шартнома (бундан буён матнда шартнома деб юритилади) тузиш ва (ёки) шартнома мажбуриятларини бажариш бўйича мажбуриятларнинг бажарилишини таъминлайдиган зақалат ёки банк кафолатини киритишни талаб қилиш;

— харидларнинг барча иштирокчиларига татбиқ этиладиган таклифларни тақдим этиш муддатларини узайтириш;

— қонунчиликда назарда тутилган ҳолларда харидлар иштирокчилари таклифларининг амал қилиш муддатини муайян даврга узайтириш тўғрисидаги таклиф билан уларга мурожаат қилиш ҳуқуқига эга.

Корхона қонунчиликка ва ўзи тузган шартномаларга мувофиқ бошқа ҳуқуқларга ҳам эга бўлиши мумкин.

6. Корхона харидларни амалга оширишда:

харидларни режалаштириши;

қонунчиликка мувофиқ харид турини танлаш тўғрисида қарор қабул қилиши;

қонунчиликда белгиланган тартибда харидларни амалга ошириши;

харидлар тўғрисидаги ахборотни қонунчиликда белгиланган тартибда ва муддатларда махсус ахборот порталига жойлаштириши;

харидлар иштирокчиларининг товарлар (ишлар, хизматлар) ва харидлар билан боғлиқ сўровлари бўйича уларга қонунчиликка мувофиқ тушунтиришлар бериши;

харидларнинг голиб деб топилган иштирокчилари билан шартномалар тузиши, шунингдек уларнинг ижро этилишини таъминлаши;

харидларни амалга оширишда аффилиланганлик тўғрисидаги ахборотни тақдим этиши;

бўлажак харидлар тўғрисидаги эълонларни фақат молиялаштириш манбалари ва миқдорлари мавжудлиги тасдиқланган тақдирдагина махсус ахборот портали орқали харидларнинг электрон тизимига ва оммавий ахборот воситаларига жойлаштириши шарт.

Корхонанинг зиммасида қонунчиликка ва ўзи тузган шартномаларга мувофиқ бошқа мажбуриятлар ҳам бўлиши мумкин.

7. Корхонанинг қонунчиликда назарда тутилган мажбуриятлари ва вазифалари корхонанинг раҳбарияти, харид комиссиялари ва харидларни ташкил этиш ва ўтказиш учун масъул бўлган корхонанинг таркибий бўлинмалари ёки алоҳида ходимлари томонидан амалга оширилиши керак.

8. Харидлар жараёни қуйидаги босқичларни ўз ичига олади:

харидларни режалаштириш;

харидларни амалга ошириш;

шартномани тузиш ва бажариш;

харидлар мониторинги.

Ўзбекистон Республикаси Президентининг фармонлари ва қарорларига мувофиқ Ўзбекистон Республикасининг Инвестиция дастурига ва бошқа давлат дастурларига киритилган лойиҳаларни «фойдаланишга тайёр ҳолда топшириш» шартлари асосида «fast-track» усулида (бир вақтнинг ўзида лойиҳалаштириш, харид қилиш ва қурилиш ишлари) амалга оширишга йўл қўйилади.

Корхона томонидан харидлар мониторинги Комплаенс хизмати томонидан мунтазам равишда амалга ошириб борилади, хусусан:

- махсус ахборот порталлари (электрон дўкон, аукцион, ва бошқа биржалар) орқали амалга оширилган битимлар, шундай битим тузилган кундан эътиборан 2 иш куни ичида харидни амалга оширишга масъул бўлган бошқарма ёки бўлим томонидан тақдим этилган ҳужжатларни ўрганиш ва ҳужжатларга кўра етказиб берувчи давлат органлари томонидан номақбул деб топилган етказиб берувчилар сафига киритилган бўлса бу ҳақда Корхонанинг харидларга масъул бўлган барча бошқарма ва бўлинмаларини ички коммуникация орқали хабардор қилиш ва келгусида шу каби етказиб берувчилар билан шартномалар тузилишига йўл қўйилмаслигини таъминлаш;

- танлаш ёки тендер амалга ошириладиган куни яъни комиссиянинг танлаш ёки тендер бўйича қабул қилинган конвертларни очиш куни барча тижорат таклиф ва тегишли ҳужжатларни юборган иштирокчиларни 2 иш куни ичида ўрганиб комиссияга ўрганиш натижаларига кўра товарларни (ишларни, хизматларни) етказиб берувчиларнинг ишончлилиги тўғрисидаги хулосани, танлаш иштирокчиси яъни товар, хизмат ва иш етказиб берувчиси иштирокчига нисбатан қўйилган талабларга мувофиқ келмаган тақдирда, асосли рад этиш хулосасини тақдим этилишини таъминлаш орқали.

Бунда танлаш ёки тендер бўйича комиссия йиғилишини баённомасини расмийлаштирилишига қонунчилик билан белгиланган муддат бузилишга йўл қўйилмаслиги лозим.

9. Харидларни режалаштириш Корхона томонидан амалга оширилади ва харидларни тизимлаштиришдан, харидларни режалаштириш ҳамда бюджет ва инвестиция жараёнларидаги режалаштириш, шунингдек хўжалик фаолиятини режалаштириш ўртасида ўзаро алоқани таъминлашдан иборат бўлади.

Келгуси йил учун харидларнинг йиллик режа-жадваллари Кузатув кенгаши томонидан тасдиқланганидан сўнг корхона томонидан жорий йилнинг 25 декабрига қадар махсус ахборот порталида жойлаштирилади.

Келгуси чорак учун харидларнинг чораклик режа-жадваллари корхона томонидан жорий чорак охиригга ойининг 25 санасига қадар махсус ахборот порталда жойлаштирилади.

10. Харидларни амалга ошириш турлари қуйидагилардан иборат:

- электрон дўкон;
- бошланғич нархни пасайтириш учун ўтказиладиган аукцион (бундан буён матнда аукцион деб юритилади);
- танлаш;
- тендер;
- тўғридан-тўғри шартномалар бўйича амалга ошириладиган харидлар;
- Ўзбекистон Республикаси Президентининг фармонлари ва қарорлари, Ўзбекистон Республикаси Вазирлар Маҳкамасининг қарорлари билан рухсат этилган харидларнинг бошқа рақобатли турлари.

Харидлар электрон шаклда амалга оширилиши мумкин.

11. Харидлар жараёнида қуйидагиларга йўл қўйилмайди:

— агар иштирокчининг ва (ёки) ушбу иштирокчи ваколатли вакилининг яқин қариндошлари ижрочини танлаш бўйича қарор қабул қилиш ҳуқуқига эга бўлса, шунингдек корхонанинг ёки у томонидан жалб этилган ихтисослашган ташкилотнинг вакили бўлса, иштирокчининг харидларда иштирок этишига;

— иштирокчиларни камситишга, бошқа иштирокчиларга зарар етказган ҳолда бир иштирокчига имтиёзлар ёки преференциялар тақдим этишга, бундан қонунчиликда назарда тутилган ҳоллар мустасно;

— манфаатлар тўқнашувига;

— харидларни амалга оширишнинг рақобатли бўлмаган усуллари қонунга ҳилоф равишда танлашга, харидлар субъектларига таъсир ўтказишга, харидларда иштирокчиларнинг иштирок этиши тўғрисидаги ахборотни ошкор этишга, уларнинг сонини асосиз равишда чеклашга ёки уларнинг малакасига қўйилган талабларни оширишга, рақобатга йўл қўймасликнинг, уни чеклашнинг ёки бартараф этишнинг бошқа шаклларига;

— харидлар ўтказилиши тўғрисидаги эълоннинг матнига иштирокчилар ўртасида рақобатни чеклайдиган қонунга ҳилоф талабларни киритишга;

— нархларни ёки иштирокчиларни саралаш натижаларини бузиб қўрсатиш мақсадида иштирокчиларнинг олдиндан тил бириктиришига;

— ишончсиз ёки бузиб қўрсатилган ахборотни тақдим этишга ёки тарқатишга, шунингдек харидлар тўғрисидаги ахборотдан фойдаланишни асосиз равишда чеклашга;

— харидларни амалга оширишнинг рақобатга асосланган усуллари четлаб ўтиш мақсадида харидлар ҳажмини қисмларга бўлиб ташлашга;

— иштирокчиларнинг сунъий тарзда пасайтирилган нархлар бўйича таклифлар беришига, кейинчалик шартномани имзолашни ёки уни тегишли тарзда бажаришни рад этишига;

— харид таркибига технологик ва функционал жиҳатдан ўзаро бир-бири билан боғлиқ бўлмаган товарларни (ишларни, хизматларни) киритишга;

— фирибгарлик, сохталаштириш ва коррупциянинг намоён бўлишига;

— молиялаштириш манбалари ва миқдорлари мавжудлиги тўғрисида тасдиқларга эга бўлмаган ёки ажратилган маблағлар ҳажмидан ортиқ миқдордаги харидларни амалга оширишга.

II. Харид комиссияси

12. Харид комиссияси харидларни ташкил этиш ва ўтказиш чоғида корхона томонидан шакллантириладиган, ушбу харидларни ўтказиш тартибида шакллантирилиши талаб этиладиган коллегиял органдир.

13. Харид комиссияси ишининг асосий мақсади харидлар иштирокчиларининг таклифларини буюртмага мувофиқлик даражаси бўйича ҳолис баҳолашдан ва тартибга солишдан ҳамда харидлар ракобатлашув усуллари орқали амалга оширилганда ғолибни (ғолибларни) танлашдан иборат.

14. Харид комиссияси корхона ҳузурида фаолият кўрсатадиган, корхона Бошқарув раисининг тегишли буйруқлари билан шакллантириладиган ва тарқатиб юбориладиган коллегиял органдир.

15. Харид комиссияси тоқ сонли аъзолардан иборат бўлади, унинг аъзолари таркиби ва сони хариднинг турига боғлиқ бўлади ҳамда қонунчиликка мувофиқ ва олинаётган товарнинг (ишнинг, хизматнинг) хусусиятлари инобатга олинган ҳолда ўзгартирилиши мумкин.

16. Харид комиссияси аъзолари ҳолис бўлиши ва харид ғолибини танлашдан шахсан манфаатдор бўлмаслиги керак.

17. Харид комиссиясининг ишига раис раҳбарлик қилади, у харид комиссияси мажлисларини чақиради ва олиб боради, овозга қўйишни ва харид комиссияси томонидан қабул қилинган қарорларни эълон қилади, шунингдек харид комиссияси мажлисларининг баённомаларини имзолайди. Харид комиссияси раиси йўқлигида унинг вазифаларини ўринбосари бажаради.

18. Харид комиссиясининг тезкор фаолиятини унинг овоз бериш ҳуқуқига эга бўлмаган масъул котиби ташкил этади.

19. Харид комиссиясининг ҳар бир аъзоси овоз беришда ёқлаб овоз бериши, қарши овоз бериши ёки унда иштирок этишдан бош тортиши мумкин. Харид комиссиясининг раиси овоз беришда иштирок этишдан бош тортиш ҳуқуқига эга эмас.

20. Харид комиссиясининг мажлислари харид комиссияси аъзолари ҳозирлигида юзма-юз ўтказилади. Юзма-юз мажлислар видеоконференциялар (телеконференциялар ва хоказо) шаклида ўтказилиши мумкин.

21. Харид комиссияси танлашни ва тендерни электрон шаклда ўтказиш чоғида ахборот-коммуникация технологиялари воситаларидан фойдаланган ҳолда масофадан туриб овоз бериш ҳуқуқига эга.

22. Харид комиссияси харидларнинг предметидан келиб чиққан ҳолда, ўз фаолиятини амалга ошириш учун экспертларни, шунингдек бошқа манфаатдор

вазирликлар, идоралар ва корхонанинг юкори турувчи ташкилоти мутахассисларини жалб этиш мумкин.

23. Харид комиссияси қарори харид комиссияси аъзолари умумий сонининг кўпчилиги овози билан қабул қилинади.

Овозлар тенг бўлиб қолган тақдирда харид комиссияси раисининг овози ҳал қилувчи овоз бўлади.

24. Харид комиссияси аъзоларида харидлар иштирокчилари билан аффилиланганлик хусусиятига эга алоқалар мавжуд бўлган тақдирда, харид комиссиясининг бундай аъзоси бу масала кўриб чиқилган мажлисда ўзини ўзи рад этиши ва мазкур масала бўйича овоз беришда иштирок этмаслиги керак, бу ҳақда харид комиссияси мажлисининг баённомасида қайд этилади.

Агар харид комиссиясига мазкур комиссия аъзосининг аффилиланганлиги мавжудлиги тегишли масала юзасидан қарор қабул қилингунига қадар маълум бўлиб қолган бўлса, унинг ўзи эса ўзини ўзи рад этмаган бўлса, бундай аъзонинг мазкур масала бўйича овоз беришига йўл кўйилмайди.

Агар харид комиссиясига тегишли масала бўйича овоз берган мазкур комиссия аъзосининг аффилиланганлиги мавжудлиги қарор қабул қилинганидан кейин маълум бўлиб қолган бўлса, бундай аъзонинг овози мазкур масала бўйича овоз бериш натижаларидан чиқариб ташланади.

25. Харид комиссияси қуйидаги вазифаларни бажаради:

- харид қилиш ҳужжатларини келишади;
- таклифлар қабул қилиш муддатларини белгилайди;
- таклифларни очиш тартиб-таомилларини белгилайди;
- таклифларни баҳолаш мезонларини ва усулларини белгилайди;
- зарур бўлганда таклиф киритиш тартибини, ҳажмини ва уни таъминлаш шаклини белгилайди;
- харид иштирокчиларининг таклифларини очишни амалга оширади;
- дастлабки малака танловини ўтказиши, агар харид қилиш ҳужжатлари шартларида бу назарда тутилган бўлса;
- зарур бўлганда дастлабки малака танлови натижаларини ҳисобга олган ҳолда қарор қабул қилади;
- зарур бўлганда баҳолаш гуруҳини ташкил этиш тўғрисида қарор қабул қилади;
- харидларни қонунчиликка мувофиқ амалга оширади;
- харидларнинг рақобатлашув турлари қолибини ва зарур бўлганда захирадаги қолибни белгилайди ёки савдони амалга оширмаган деб топади.

26. Харид комиссияси харидлар ижрочисини аниқлаш тартиб-таомилларининг қонунчилик талабларига мувофиқлиги, ўзи қабул қилаётган қарорларнинг асослилиги ва беғаразлиги учун жавобгар бўлади.

27. Харид комиссияси харидларнинг бошқа субъектлари томонидан амалга ошириладиган ҳаракатлар учун жавобгар бўлмайди.

28. Харид комиссияси томонидан ўз ваколати доирасида қабул қилинадиган қарорлар корхона ва харидлар иштирокчилари учун мажбурийдир.

III. Товарлар (ишлар, хизматлар) хариди буюртмасини (бундан буён матнда буюртманома деб юритилади) расмийлаштириш

29. Корхона таркибий тузилмалари долзарб ишлаб чиқариш режаси ва/ёки режалаштирилган ишлар ҳажмидан келиб чиқиб буюртманомани уларнинг тегишли техник топшириғини илова қилган ҳолда ўрнатилган тартибда ва шаклда расмийлаштиришади ҳамда корхона тегишли таркибий тузилмаларига киритишади.

Шу билан бирга, харид тартиб тамоилларини ўтказишга масъул бошқарма :

-буюртманомани ЕХАТ тизими орқали қабул қилиб олган кундан эътиборан 3 иш куни ичида буюртманомани асосли деб ижрога қабул қилиши еки буюртманома ўрнатилган тартибда расмийлаштирилмаган ва асоссиз деб қайта ишлаш учун рад этиши;

- буюртманома асосли деб қабул қилинганидан сўнг, шу кундан эътиборан маҳаллий товар, иш ва хизмат бўлса 3 ой ичида, импорт товар, иш ва хизмат бўлса 6 ой ичида қаноатлантирилишини яъни буюртманомадаги товар, иш ва хизматни ўрнатилган тартибда харид қилинишини таъминлаши лозим.

IV. Электрон дўкон воситасида харидларни амалга ошириш

30. Электрон дўконда:

— бир шартнома бўйича базавий ҳисоблаш миқдорининг йигирма беш минг бараваригача кийматдаги товарларнинг;

— бир шартнома бўйича базавий ҳисоблаш миқдорининг юз бараваригача кийматдаги ишларнинг, хизматларнинг харидлари амалга оширилиши мумкин.

31. Электрон дўкон иштирокчиларнинг таклифларидан шакллантирилади. Иштирокчининг электрон дўконда қўйилган таклифи оммавий офертadır.

32. Корхона электрон дўконда иштирокчиларнинг оферталарини ўрганиш йўли билан ўзи учун зарур бўлган товарни (ишни, хизматни) танлайди ва товар (иш, хизмат) танланганидан кейин нархлар сўрови механизмидан фойдаланади.

33. Харидларнинг электрон тизими корхона ва энг паст нархни таклиф қилган ижрочи ўртасида тузилган битимни рўйхатдан ўтказди.

Иштирокчилар тўғрисидаги маълумотлардан корхона ёки иштирокчилар яқунлар сарҳисоб қилинадиган пайтга қадар фойдалана олмайди. Ижрочининг номи ғолиб аниқланган пайтда харидларнинг электрон тизимида акс этирилади.

Харидларнинг электрон тизими шартномани корхона томонидан танланган иштирокчининг офертасида баён этилган шартларга мувофиқ ҳамда иштирокчилар томонидан таклиф этилган энг паст нархда шакллантиради.

34. Харидларнинг якунига кўра фақат танлаб олинган офертани таклиф қилган иштирокчигина иштирок этган ҳолларда харидларнинг электрон тизими корхонага электрон шаклда савдолашиш имконини берувчи сўровни юборади. Бунда корхонада танлаб олинган офертани таклиф қилган иштирокчига у таклиф қилган нархдан пастрок асосланган нарх сўровини юбориш имконияти пайдо бўлади. Танлаб олинган офертани таклиф қилган иштирокчи бундай сўровни бир иш куни ичида қабул қилиши ёки рад этиши мумкин.

Танлаб олинган офертани таклиф қилган иштирокчи нарх сўровини қабул қилганда харидларнинг электрон тизими корхона ва ижрочи ўртасидаги битимни корхона томонидан юборилган сўров нархи асосида рўйхатдан ўтказди.

Агар танлаб олинган офертани таклиф қилган иштирокчи нарх сўровини қабул қилмаса ёки рад этса, корхона ўз хохишига кўра мазкур иштирокчи билан шартномани

расмийлаштириши ёки қонунчилик талабларига мувофиқ аукцион ёки танлаш орқали харидни амалга ошириши мумкин. Бунда жавобгарлик корхонанинг зиммасига юклатилади.

Агар харидлар тугаганидан кейин бир иш куни ичида корхона томонидан нарх сўрови юборилмаса, харидларнинг электрон тизими корхона ва ижрочи ўртасидаги битимни рўйхатдан ўтказилади.

35. Корхона томонидан нархларни ўрганиш харидларнинг электрон тизими ёки бошқа очик манбаларнинг маълумотларидан фойдаланиш орқали амалга оширилиши мумкин.

V. Аукцион воситасида харидларни амалга ошириш

36. Аукцион воситасидаги харид қуйидаги шартлар бир вақтнинг ўзида бажарилган тақдирда амалга оширилади:

товарнинг стандарт хусусиятларга эга бўлиши;

товарнинг техник, эксплуатация қилиниш хусусиятларини ва бошқа хусусиятларини баҳолаш ҳамда таққослаш зарурати мавжуд эмаслиги;

товарнинг қиймати бир шартнома бўйича базавий ҳисоблаш миқдорининг йигирма беш минг бараваригача бўлган миқдорини ташкил этиши керак.

Хизматлар ва ишлар хариди аукцион объекти бўла олмайди.

37. Товарни эълонда баён этилган шартлар асосида энг паст нарх бўйича етказиб беришни таклиф қилган иштирокчи аукцион ғолиби бўлади. Бунда мазкур норма белгиланган сифат стандартларига мувофиқ бўлган товарларни етказиб бериш талабини бекор қилмайди.

38. Аукцион фақат электрон шаклда ўтказилади.

39. Аукционда иштирок этиш учун корхона махсус ахборот портали орқали харидларнинг электрон тизимига эълон жойлаштирилади.

Аукцион ўтказилиши тўғрисидаги эълон у амалга оширилишидан камида беш иш куни аввал жойлаштирилиши керак.

Аукцион ўтказилиши тўғрисидаги эълонда қуйидаги маълумотлар бўлиши керак:

Корхонанинг номи ва манзили;

аукционнинг биринчи ва охири куни (аукцион ўтказиладиган давр);

аукцион предметининг бошланғич нархи;

аукцион предмети ва унинг хусусияти (аукцион предметининг таснифи);

товарнинг миқдори;

товарларни етказиб бериш муддатлари ва шартлари;

товарлар етказиб бериладиган жой (манзил);

товарнинг амалдаги стандарт талабига мувофиқлигини тасдиқловчи ҳужжат мавжудлиги ҳақидаги талаб;

товар мажбурий сертификатлаштирилиши талаб этиладиган ҳолларда, мувофиқлик сертификати ва санитария-эпидемиологик ҳулоса мавжудлиги тўғрисидаги талаб;

зарур бўлганда, лицензия, руҳсат этиш хусусиятига эга бошқа ҳужжат ёхуд фаолиятни бошлагани ҳақидаги хабарнома мавжудлиги тўғрисидаги талаб;

товарнинг ўзига хос хусусий параметрларини ифодаловчи шартлар.

Аукцион ўтказилиши тўғрисидаги эълоннинг ва корхона буюртманомасининг матнига аукцион предметига тааллуқли бўлмаган ва иштирокчилар ўртасида рақобатни чеклайдиган талабларни киритиш тақиқланади.

Махсус ахборот портали орқали харидларнинг электрон тизимига жойлаштирилган аукцион ўтказилиши тўғрисидаги эълон автоматик равишда корхонанинг буюртманомаси этиб ўзгартирилади.

40. Аукцион харидларнинг электрон тизимида бошланғич нархни кадам-бақадам пасайтириш йўли билан ўтказилади.

Аукционни ўтказиш, киритилган таъминот суммасига мувофиқ ҳар бир лот бўйича аукциондан фойдаланиш, аукцион ғолибларини аниқлаш, битимни рўйхатдан ўтказиш ва шартномани шакллантириш харидларнинг электрон тизими томонидан автоматик режимда амалга оширилади.

41. Аукционни ўтказиш чоғида иштирокчилар аукцион бошланган пайтдан эътиборан ва у тамом бўладиган пайтга қадар бутун муддат ичида нарх бўйича таклифларни чекланмаган миқдорда беришга ҳақли.

42. Иштирокчиларнинг номи ва улар билан боғланишга доир маълумотлар аукцион ғолиби аниқланадиган пайтга қадар харидларнинг электрон тизимида акс эттирилмайди.

43. Аукцион тугайдиган вақт келганда харидларнинг электрон тизими аукцион ўтказилган вақт давомида берилган таклифлар орасида энг паст нархни таклиф қилган таклифни автоматик равишда аниқлаб олади. Энг паст нарх кўрсатилган таклифни берган иштирокчи аукцион ғолиби сифатида харидларнинг электрон тизими томонидан саралаб олинади. Ижрочининг номи харидларнинг электрон тизимида акс эттирилиб, ушбу тизим тузилган битимни автоматик равишда қайд этади ва корхонанинг буюртманомасида баён этилган шартларга мувофиқ шартномани шакллантиради.

44. Агар аукционда бир нафар иштирокчи иштирок этган бўлса ёки ҳеч ким иштирок этмаган бўлса, аукцион ўтказилмаган деб ҳисобланади ва ғолиб аниқланмайди. Корхона аукционни уч иш қунига узайтириши ёки харидни қонунчиликка мувофиқ электрон дўкон ёки танлаш воситасида амалга ошириши мумкин.

Аукционни узайтириш аввалги аукцион тамом бўлган пайтдан эътиборан уч иш қуни ичида корхона томонидан амалга оширилади.

VI. Танлаш воситасида харидларни амалга ошириш

45. Танлаш воситасидаги харид қуйидаги шартлар бир вақтнинг ўзида бажарилган тақдирда амалга оширилади:

ғолибни аниқлаш мезонлари товар (иш, хизмат) хариднинг нафақат пул ифодасига, балки миқдорий ва сифат баҳосига ҳам эга бўлади;

товарнинг (ишнинг, хизматнинг) қиймати бир шартнома бўйича базавий ҳисоблаш миқдорининг йигирма беш минг бараваригача бўлган миқдорни ташкил этади.

46. Агар Ўзбекистон Республикаси Президентининг фармонлари ва қарорлари, Ўзбекистон Республикаси Вазирлар Маҳкамасининг қарорлари билан тендер ўтказмасдан харидларни амалга ошириш ҳуқуқи берилса, харид суммасидан қатъий назар танлаш орқали амалга оширилади. Бунда товарларнинг (ишларнинг, хизматларнинг) қиймати базавий ҳисоблаш миқдорининг йигирма беш минг баравари миқдоридан ошган ҳолларда харидга доир техник топшириқлар қонунчиликда белгиланган тартибда экспертиза учун Ўзбекистон Республикаси Иқтисодий тараққиёт ва камбағалликни қисқартириш вазирлиги ҳузуридаги «Лойиҳалар ва импорт контрактларини комплекс экспертиза қилиш маркази»

давлат унитар корхонасига (бундан буён матнда Комплекс экспертиза қилиш маркази деб юритилади) киритилади.

Харид қилинадиган товарларнинг (ишларнинг, хизматларнинг) қиймати базавий ҳисоблаш миқдорининг йигирма беш минг баравари миқдоридан ошмаган ҳоллардаги харидга доир техник топшириқлар ва харид ҳужжатлари Комплекс экспертизадан ўтказилмайди.

47. Танлаш мажбурий тартибда электрон шаклда ўтказилади, бундан қонунчиликда назарда тутилган ҳоллар мустасно.

48. Харидни танлаш орқали амалга ошириш учун корхонанинг ходимлари орасидан камида беш нафар аъзодан иборат таркибда харид комиссияси тузилади.

Танлашни ўтказишда харид комиссияси аъзоларининг камида учдан икки қисми ҳозир бўлиши лозим, ҳар бир мажлис ва қабул қилинган қарор баённомалар билан расмийлаштирилади.

49. Танлаш воситасидаги харид тўғрисидаги ахборот корхона томонидан чекланмаган миқдордаги шахсларга махсус ахборот портали орқали харидларнинг электрон тизимига, шунингдек корхонанинг хоҳишига кўра — унинг расмий веб-сайтига ёки унинг юқори турувчи органининг расмий веб-сайтига, шунингдек оммавий ахборот воситаларида танлаш ўтказиш тўғрисидаги эълонни ва танлаш воситасидаги харид ҳужжатларини (бундан буён матнда танлаш ҳужжатлари деб юритилади) жойлаштириш йўли билан маълум қилинади.

50. Агар Ўзбекистон Республикаси Президентининг фармонлари ва қарорлари, Ўзбекистон Республикаси Вазирлар Маҳкамасининг қарорлари билан тендер ўтказмасдан харидларни амалга ошириш ҳуқуқи бериладиган бўлса, танлаш ўтказиш тўғрисидаги эълон фақат харидга доир техник топшириқ бўйича Комплекс экспертиза қилиш марказининг ижобий ҳулосаси олинганидан кейин жойлаштирилади.

51. Танлаш ўтказилиши тўғрисидаги эълон ва танлаш ҳужжатлари корхона томонидан таклифларни қабул қилиш муддати тугайдиган санадан камида беш иш куни олдин махсус ахборот портали орқали харидларнинг электрон тизимига, шунингдек корхонанинг хоҳишига кўра — ўзининг расмий веб-сайтига ёки ўзининг юқори турувчи органининг расмий веб-сайтига, шунингдек оммавий ахборот воситаларида жойлаштирилади.

Харид қилинаётган товарнинг (ишнинг, хизматнинг) ўзига хос хоссаларидан ёки хусусиятларидан келиб чиқиб, корхона танлаш ўтказилиши тўғрисидаги эълонни ушбу банднинг биринчи хатбошисида белгиланганига нисбатан узоқроқ муддатга жойлаштиришга ҳақли.

52. Танлаш ўтказилиши тўғрисидаги эълон қуйидаги ахборотларни ўз ичига олиши керак:

- танлашни ўтказиш шакли;
- товарнинг (ишнинг, хизматнинг) батафсил тавсифи ва бошланғич нархи;
- танлаш ўтказиладиган жойнинг манзили;
- иштирокчиларга қўйиладиган талаблар;
- корхонанинг иштирокчилар билан боғланиш учун алоқа боғловчи шахслар сифатида белгиланган бир ёки бир нечта мансабдор шахсларининг ёки бошқа ходимларининг фамилияси, исми, шарифи, лавозими ва манзили;
- иштирокчилар томонидан таклифлар бериш муддати тугайдиган сана ва вақт;
- таклифни расмийлаштиришга доир талаблар.

Танлаш ўтказиш тўғрисидаги эълон ва (ёки) танлашда иштирок этиш учун таклиф қонунчиликка зид бўлмаган бошқа ахборотларни ҳам ўз ичига олиши мумкин.

53. Танлаш ҳужжатлари махсус ахборот портали орқали харидларнинг электрон тизимига танлаш ўтказилиши тўғрисидаги эълонни жойлаштириш билан бир вақтда корхона томонидан жойлаштирилади.

Танлаш ҳужжатлари қуйидагиларни ўз ичига олади:

- танлаш ўтказилиши тўғрисидаги эълонда кўрсатилган ахборот;
- ижрочилар билан ҳисоб-китобларни шакллантириш учун фойдаланиладиган валюта, тўлов тартиби ва етказиб бериш шартлари ҳақидаги ахборот;
- танлашда иштирок этиш учун таклифни давлат тилида ва, заруриятга қараб, бошқа тилларда тайёрлаш мажбурийлиги тўғрисидаги талаб;
- иштирокчиларга танлаш ҳужжатлари қоидаларига доир тушунтиришларни тақдим этиш тартиби, тақдим этиш муддати бошланадиган ва тугайдиган сана;
- техник топширик;
- қонунчиликка мувофиқ таклифларни баҳолаш мезонлари ва кўриб чиқиш тартиби;
- танлаш иштирокчилари томонидан коррупция кўринишларига йўл қўймаслик бўйича ариза тақдим этиш мажбурийлиги ҳақидаги талаб;
- танлаш иштирокчиларини Корхонанинг комплаенс талабларига жавоб беришини ўрганиш учун комплаенс хизмати томонидан тайерланадиган сўровномани тўлдириш тўғрисидаги талаб.

54. Танлаш ҳужжатларида корхона ҳар бир товар (иш, хизмат) хариднинг алоҳида бирлиги сифатида кўриб чиқилишини эълон қилиши мумкин. Бундай ҳолда корхона турли товарларни (ишларни, хизматларни) етказиб бериш учун танлашнинг бир нечта иштирокчиси билан шартномалар тузиши мумкин, бунда ҳар бир товар (иш, хизмат) учун фақат битта ғолиб аниқланиши мумкин. Ҳар бир товар (иш, хизмат) учун ғолиб хариднинг шартларига кўра алоҳида-алоҳида аниқланади.

55. Танлаш ҳужжатларига уларнинг ажралмас қисми бўлган шартнома лойиҳаси илова қилинади.

Корхона масъул таркибий тузилмаси харид комиссияси билан келишилган танлаш ҳужжатларини тасдиқлайди.

56. Корхона харид комиссияси билан келишилган ҳолда танлашда иштирок этиш учун таклифлар бериш муддати тугайдиган санадан бир иш кунидан кечиктирмай танлаш ҳужжатларига ўзгартиришлар киритиш тўғрисида қарор қабул қилишга ҳақли. Бунда ушбу танлашда таклифларни тақдим этишнинг тугаш муддати камида уч иш кунига узайтирилади. Шу билан бирга, эълонда кўрсатилган ахборот ўзгартирилган бўлса, танлаш ўтказиш тўғрисидаги эълонга ўзгартиришлар киритилади. Товарларни (ишларни, хизматларни) ўзгартиришга йўл қўйилмайди.

57. Танлаш иштирокчиларининг таклифлари эълонда ва танлаш ҳужжатларида белгиланган тартибда танлаш ўтказиш тўғрисидаги эълонда кўрсатилган манзил бўйича муҳрланган конвертларда тақдим этилади.

Электрон шаклда танлаш ўтказиш чоғида танлаш иштирокчиларининг таклифларини бериш тартиби Ўзбекистон Республикаси Вазирлар Маҳкамаси томонидан белгиланади.

58. Таклифда харид объекти бўлган товарнинг эскизи, расми, чизмаси, фотосурати

ва бошқа тасвири, нусхаси, намунаси бўлиши мумкин.

59. Танлаш иштирокчиси тақдим этилаётган ахборот ва ҳужжатларнинг хақиқийлиги ва тўғрилиги учун жавобгар бўлади.

60. Танлаш иштирокчиси фақат битта таклиф беришга ҳақли.

61. Танлаш учун таклифларни қабул қилиш махсус ахборот портали орқали харидларнинг электрон тизимида чоп этилган эълонда кўрсатилган муддат келиши билан тугатилади.

62. Агар танлашда иштирок этиш учун таклифларни тақдим этиш муддати тугаган пайтда фақат битта таклиф тақдим этилган ёки бирорта ҳам таклиф тақдим этилмаган бўлса, танлаш ўтказилмаган деб ҳисобланади. Бунда корхона қонунчилик талабларига мувофиқ янги танлаш ўтказиши ёхуд электрон дўкон ёки аукцион орқали харидни амалга ошириши мумкин.

63. Эълонда танлаш ўтказиладиган вақт сифатида кўрсатилган вақтда танлаш комиссияси танлаш иштирокчилари томонидан берилган таклифлар солинган конвертларни таклифларни баҳолаш учун очади. Келиб тушган таклифлар харид комиссияси томонидан кўриб чиқилади. Танлаш ҳужжатлари талабларига мос келмайдиган таклифлар харид комиссияси томонидан рад этилади ва баҳоланмайди. Танлашни ўтказишда иштирокчиларнинг бошланғич нархдан юқори бўлган нарх бўйича таклифлари харид комиссияси томонидан рад этилади ва баҳоланмайди.

64. Агар харид комиссияси томонидан иштирокчилардан танлаш ҳужжатларида кўрсатилган талабларга жавоб берадиган камида иккита таклиф олинган бўлса, танлаш ўтказилган деб ҳисобланади.

65. Иштирокчиларнинг барча таклифлари танлаш ҳужжатларида кўрсатилган мезонлар асосида баҳоланади ва танлаш ўтказиш баённомасида қайд этилади.

Танлаш иштирокчиларининг таклифларини кўриб чиқиш ва баҳолаш муддати таклифлар бериш тугаган пайтдан эътиборан ўн иш кунидан ошиши мумкин эмас.

Иштирокчиларнинг таклифларини баҳолаш икки босқичда амалга оширилиши мумкин.

Корхона томонидан танлаш иштирокчиларининг таклифларини кўриб чиқиш учун конвертларни очиш куни Комплаенс хизмати ўз таклифларини юборган барча иштирокчиларни икки иш куни ичида ўрганиб ҳар бир иштирокчини Корхонанинг комплаенс талабларига жавоб бериши ёки жавоб бермаслиги тўғрисидаги асослантирилган хулосаларини комиссияга тақдим этиши лозим. Комплаенс хизматининг хулосалари тақдим этилгач, Комиссия харид тартиб-тамойиллари бўйича ўз ишини давом эттириши мумкин. Бунда харид тартиб-тамойиллари талабларига кўра таклифларни кўриб чиқиш ва расмийлаштириш бўйича белгиланган муддатга амал қилиниши лозим.

66. Суммаси бир шартнома бўйича базавий ҳисоблаш миқдорининг эллик баравари миқдоридан ошмайдиган танлаш харид комиссиясининг иштирокисиз ўтказилиши мумкин, бироқ бир молия йилида бир корхона учун базавий ҳисоблаш миқдорининг бир минг баравари миқдоридаги суммадан кўп бўлмаслиги керак. Бунда ғолиб корхона томонидан танлаш ўтказилиши тўғрисидаги эълонни жойлаштирмасдан, очиқ ахборот манбаларидан олинган нархларни солиштириш йўли билан ёки товарларнинг (ишларнинг, хизматларнинг) потенциал етказиб берувчиларидан нархларни сўраш йўли билан аниқланади. Расмийлаштирилган ҳужжатлар, тузилган шартномалар ва уларга доир қўшимча келишувлар тўғрисидаги ахборот улар расмийлаштирилган ёки тузилган санадан эътиборан уч иш кунидан кечиктирмай корхона томонидан махсус ахборот порталида жойлаштиради.

67. Таклифларни таққослаш натижаларига кўра харид комиссияси танлаш ғолибини

аниқлайди ва танлаш ўтказиш натижаларини баённомада акс эттиради.

Харид комиссиясининг қарори билан танлаш ҳужжатларида ва таклифда кўрсатилган мезонларга мувофиқ ғолибнинг таклифидан кейинги энг мақбул таклифни тақдим этган иштирокчи сифатида эътироф этилган захирадаги ғолиб аниқланиши мумкин.

68. Баённома корхона томонидан у расмийлаштирилган кунда харидларнинг электрон тизимига муҳокама қилиш учун икки иш кунига жойлаштирилиши керак.

Агар икки иш куни ичида танлаш иштирокчилари томонидан танлаш ўтказиш натижалари бўйича эътирозлар келиб тушмаган бўлса, корхона ва харид комиссияси томонидан ғолиб деб топилган иштирокчи ўртасида шартнома тузилади.

Муҳокама учун белгиланган муддат тугаганидан кейин келиб тушган эътирозлар харид комиссияси томонидан кўриб чиқилмайди.

Танлаш иштирокчилари томонидан танлаш ўтказиш натижалари бўйича эътирозлар келиб тушганда, харид комиссияси эътирозларни кўриб чиқади ва тегишли қарор қабул қилади.

69. Корхона томонидан харид комиссиясига тақдим этилган муҳокама натижалари тўғрисидаги ахборот асосида харид комиссиясининг тегишли мажлиси баённомаси расмийлаштирилади ва имзоланган кундан бошлаб уч иш куни ичида харидларнинг электрон тизимига жойлаштирилади.

70. Танлаш натижалари бўйича тузилган шартнома тўғрисидаги ахборот корхона томонидан махсус ахборот порталига у тузилган кундан бошлаб уч иш кунидан кечиктирмай жойлаштирилади.

Танлаш натижаларига доир шартнома танлаш ҳужжатларида ва ўзи билан шартнома тузилаётган танлаш иштирокчиси томонидан тақдим этилган таклифда назарда тутилган шартлар асосида тузилади.

Корхона томонидан танлаш ҳужжатларида ғолиб шартноманинг шартлари бажарилиши таъминотини тақдим этганидан кейин шартнома тузилишини назарда тутувчи шарт қўйилиши мумкин.

71. Ғолиб шартнома тузишни рад этган тақдирда унга закат суммаси қайтариб берилмайди. Агар харид комиссияси томонидан захирадаги ғолиб аниқланган бўлса, шартнома тузиш ва унга доир мажбуриятларни бажариш ҳукуқи захирадаги ғолибга ўтади. Бунда захирадаги ғолиб томонидан таклиф этилган нарх бўйича (бундан захирадаги ғолиб таклиф этган нарх ғолиб томонидан таклиф этилган нархдан паст бўлган ҳоллар мустасно) шартнома тузади ёки шартнома тузишни рад этиши мумкин.

72. Агар харид комиссияси томонидан захирадаги ғолиб аниқланмаган бўлса ёки захирадаги ғолиб шартнома тузишни рад этган бўлса, корхона қонунчилик талабларига мувофиқ янги танлаш ўтказиши ёхуд электрон дўкон ёки аукцион орқали харидни амалга ошириши мумкин.

VII. Тендер воситасида харидларни амалга ошириш

73. Тендер воситасидаги харид қуйидаги шартлар бир вақтнинг ўзида бажарилган тақдирда амалга оширилади:

— ғолибни аниқлаш мезонлари товарнинг (ишнинг, хизматнинг) нафақат пул билан баҳоланишини, балки миқдорий ва сифат жиҳатидан баҳоланишини ҳам ўз ичига олади;

— товарларнинг (ишларнинг, хизматларнинг) қиймати бир шартнома бўйича базавий ҳисоблаш миқдорининг йигирма беш минг бараваридан ортиқ миқдорни ташкил этади.

Тендер мажбурий тартибда электрон шаклда ўтказилади, бундан қонунчиликда назарда тутилган ҳоллар мустасно.

74. Харидни тендер ўтказиш орқали амалга ошириш учун камида етти нафар аъзодан иборат таркибда харид комиссияси тузилади.

Шартномани бажаришнинг энг яхши шартлари тендер иштирокчиларининг таклифларини баҳолаш бўйича эълон қилинган мезонлар асосида харид комиссияси томонидан аниқланади.

Агар мажлисда харид комиссияси аъзолари умумий сонининг камида учдан икки қисми ҳозир бўлса, харид комиссияси ваколатли ҳисобланади. Барча қабул қилинган қарорлар баённомалар билан расмийлаштирилади.

75. Тендер воситасидаги харид тўғрисидаги ахборот қорхона томонидан чекланмаган миқдордаги шахсларга махсус ахборот портали орқали харидларнинг электрон тизимига, шунингдек қорхонанинг хоҳишига кўра унинг веб-сайтига ёки унинг юқори турувчи органининг расмий веб-сайтига, шунингдек оммавий ахборот воситаларида тендер ўтказилиши тўғрисидаги эълонни ва тендер воситасидаги харид ҳужжатларини (бундан бўён матнда тендер ҳужжатлари деб юритилади) жойлаштириш йўли билан маълум қилинади.

Тендер ўтказилиши тўғрисидаги эълон фақат тендер ҳужжатлари юзасидан Комплекс экспертиза қилиш марказининг ижобий ҳулосаси олинганидан кейин жойлаштирилади.

Тендер ўтказилиши тўғрисидаги эълон тендер иштирокчиларидан таклифларни қабул қилиш муддати тугайдиган санадан камида ўн икки иш куни ва кўпи билан ўттиз иш куни олдин махсус ахборот портали орқали харидларнинг электрон тизимига қорхона томонидан жойлаштирилади.

76. Тендер ўтказилиши тўғрисидаги эълон қуйидаги ахборотни ўз ичига олиши керак:

- тендерни ўтказиш шакли;
- товарнинг (ишнинг, хизматнинг) батафсил тавсифи ва бошланғич нархи;
- тендер ўтказиладиган жойнинг манзили;
- тендер иштирокчиларига қўйиладиган талаблар;
- қорхонанинг иштирокчилар билан боғланиш учун алоқа боғловчи шахслар сифатида белгиланган бир ёки бир нечта мансабдор шахсларининг ёки бошқа ходимларининг фамилияси, исми, шарифи, лавозими ва манзили;
- таклифлар бериш муддати тугайдиган сана ва вақт;
- тендер таклифини расмийлаштиришга доир талаблар;

Тендер ўтказиш тўғрисидаги эълон қонунчиликка зид бўлмаган бошқа ахборотни ҳам ўз ичига олиши мумкин.

77. Тендер ҳужжатлари махсус ахборот портали орқали харидларнинг электрон тизимига тендер ўтказилиши тўғрисидаги эълонни жойлаштириш билан бир вақтда қорхона томонидан жойлаштирилади.

Тендер ҳужжатлари куйидагиларни ўз ичига олиши керак:

- тендер ўтказилиши тўғрисидаги эълонда кўрсатилган ахборот;
- шартнома баҳосини ва ижрочилар билан ҳисоб-китобларни шакллантириш учун фойдаланиладиган валюта ҳамда тўлов тартиби ҳақидаги ахборот;
- тендерда иштирок этиш учун таклифни давлат тилида ва, заруриятга қараб, бошқа тилларда тайёрлаш мажбурийлиги тўғрисидаги талаб;
- тендер иштирокчиси таклифининг техник ва нархга оид қисми, уларни баҳолаш тартиби ҳақидаги ахборот;
- тендер иштирокчиларига тендер ҳужжатлари қодаларига доир тушунтиришларни тақдим этиш тартиби, тақдим этиш муддати бошланадиган ва тугайдиган сана;
- техник топширик;
- конунчиликка мувофиқ тендер иштирокчиларининг таклифларини баҳолаш мезонлари ва кўриб чиқиш тартиби;
- танлаш иштирокчилари томонидан коррупция кўринишларига йўл қўймаслик бўйича ариза тақдим этиш мажбурийлиги ҳақидаги талаб;
- танлаш иштирокчиларини Корхонанинг комплаенс талабларига жавоб беришини ўрганиш учун сўровномани тўлдириш тўғрисидаги талаб.

78. Тендер ҳужжатларида корхона ҳар бир товар (иш, хизмат) хариднинг алоҳида бирлиги сифатида кўриб чиқилишини эълон қилиши мумкин. Бундай ҳолда корхона турли товарларни (ишларни, хизматларни) етказиб бериш учун тендернинг бир нечта иштирокчиси билан шартномалар тузиши мумкин, бунда ҳар бир товар (иш, хизмат) учун фақат битта ғолиб аниқланиши мумкин. Ҳар бир товар (иш, хизмат) учун ғолиб харид шартларига кўра алоҳида-алоҳида аниқланади.

79. Тендер ҳужжатларига унинг ажралмас қисми бўлган шартнома лойиҳаси илова қилинади.

Корхона масъул таркибий тузилмаси харид комиссияси билан келишилган тендер ҳужжатларини тасдиқлайди.

Корхона масъул таркибий тузилмаси харид комиссияси билан келишилган ҳолда тендерда иштирок этиш учун таклифлар бериш муддати тугайдиган санадан камида бир иш куни олдин тендер ҳужжатларига ўзгартишлар киритиш тўғрисида қарор қабул қилишга ҳақли. Бунда ушбу тендерда таклифлар бериш тугайдиган муддат камида ўн иш кунига узайтирилади. Шу билан бир вақтда, агар эълонда кўрсатилган ахборот ўзгартирилган бўлса, тендер ўтказиш тўғрисидаги эълонга ўзгартишлар киритилади. Товарнинг (ишнинг, хизматнинг) номини ўзгартиришга йўл қўйилмайди.

80. Тендер иштирокчиси корхонага тендер ҳужжатлари қодаларига доир тушунтиришлар бериш тўғрисида сўров юборишга ҳақли. Мазкур сўров келиб тушган санадан эътиборан икки иш куни ичида корхона, агар ушбу сўров корхонага таклифлар бериш муддати тугайдиган санадан камида икки иш куни олдин келиб тушган бўлса, тендер ҳужжатларининг қодаларига доир тушунтиришларни юборади. Тендер ҳужжатларининг қодаларига доир тушунтиришлар уларнинг мазмун-моҳиятини ўзгартирмаслиги керак.

81. Тендер ҳужжатлари қонунчиликда белгиланган тартибда экспертиза учун Комплекс экспертиза қилиш марказига киритилади. Корхона тузилган шартномалар, импорт контрактлари ва уларга қўшимча келишувларнинг тендер ҳужжатларига мувофиқлиги ва ҳақиқийлиги учун жавобгар бўлади.

82. Тендер иштирокчиларининг таклифлари эълонда ва тендер ҳужжатларида белгиланган тартибда тендер ўтказиш тўғрисидаги эълонда кўрсатилган манзил бўйича муҳрланган конвертларда тақдим этилади.

Электрон шаклда тендер ўтказиш чоғида тендер иштирокчиларининг таклифларини бериш тартиби Ўзбекистон Республикаси Вазирлар Маҳкамаси томонидан белгиланади.

Таклифда харид объекти бўлган товарнинг эскизи, расми, чизмаси, фотосурати ва бошқа тасвири, нусхаси, намунаси бўлиши мумкин.

Тендер иштирокчиси тақдим этилаётган ахборот ва ҳужжатларнинг ҳақиқийлиги ва тўғрилиги учун жавобгар бўлади.

Тендер иштирокчиси фақат битта таклиф беришга ҳақли.

Тендерда иштирок этиш учун таклифларни қабул қилиш махсус ахборот портали орқали харидларнинг электрон тизимида чоп этилган эълонда кўрсатилган муддат келиши билан тугатилади.

83. Агар таклифлар бериш муддати тугаган вақтда тендер иштирокчиларидан камида иккита таклиф олинган бўлса, тендер иштирокчиларининг таклифлари харид комиссияси томонидан кўриб чиқилади.

Тендерда битта иштирокчи иштирок этган ёки ҳеч ким иштирок этмаган бўлса, тендер ўтказилмаган деб топилади. Бундай ҳолда корхона харидни айна ўша шартларда ҳамда товарга (ишга, хизматга) доир айна ўша мезонларга ва талабларга мувофиқ такроран амалга ошириши шарт. Товарга (ишга, хизматга) доир баҳолаш шартлари, мезонлари ва талабларни ўзгартириш зарур бўлганда, харид комиссияси асосларни кўрсатган ҳолда тегишли қарорни қабул қилади. Тендер иштирокчиси бундай таклифларни бериш муддати тугагунига қадар берилган таклифни қайтариб олишга ёки унга ўзгартишлар киритишга ҳақли.

84. Тендер иштирокчиларининг таклифларини кўриб чиқиш ва баҳолаш муддати таклифлар бериш тугаган пайтдан эътиборан қирқ беш иш кунидан ошиши мумкин эмас.

Агар таклиф қонунчиликнинг ва тендер ҳужжатларининг талабларига мувофиқ келса, у тегишли тарзда расмийлаштирилган деб топилади.

Агар таклифни киритган тендер иштирокчиси қонунчиликда белгиланган талабларга мос келмаса ёки тендер иштирокчисининг таклифи тегишли тарзда расмийлаштирилмаган бўлса, шунингдек тендер ҳужжатлари талабларига мувофиқ келмаса, харид комиссияси таклифни рад этади.

Эълонда тендер ўтказиш вақти сифатида кўрсатилган вақтда харид комиссияси тендер иштирокчилари томонидан тақдим этилган таклифлар солинган конвертларни таклифларни баҳолаш учун очади. Агар таклифлар солинган конвертлар белгиланган вақтда очилмаган бўлса, корхона тендер иштирокчиларига ушбу ҳолат юзасидан асослангилган тушунтириш берган ҳолда, таклифлар солинган конвертлар очиладиган вақт ҳақида хабарнома юборилишини ва харидларнинг электрон тизимига жойлаштирилишини таъминлайди. Бунда таклифлар солинган конвертлар очиладиган дастлабки белгиланган вақт ва кейинги вақт оралиғидаги муддат беш иш кунидан ошмаслиги керак.

Тендер таклифлари солинган конвертларни очиш жараёни вақтида корхона томонидан видеоёзув амалга оширилади ҳамда конвертларни очиш жараёнида иштирокчиларнинг тақдим этган барча ҳужжатлари ва тендер таклифининг нархи ўқиб эшиттирилади, бундан тендер электрон шаклда ўтказиладиган ҳоллар мустасно.

85. Тендер иштирокчиси томонидан тақдим этилган ҳужжатлардаги ахборотнинг ишончсиз эканлиги аниқланган тақдирда, харид комиссияси бундай иштирокчини хариднинг исталган боскичида тендерда иштирок этишдан четлатишга ҳақли.

Корхона томонидан тендер иштирокчиларининг таклифларини кўриб чиқиш учун конвертларни очиш куни Комплаенс хизмати ўз таклифларини юборган барча иштирокчиларни икки иш куни ичида ўрганиб хар бир иштирокчини Корхонанинг комплаенс талабларига жавоб бериши еки жавоб бермаслиги тўғрисидаги асослантирилган хулосаларини комиссияга тақдим этиши лозим. Комплаенс хизматининг хулосалари тақдим этилгач, Комиссия харид тартиб-тамойиллари бўйича ўз ишини давом эттириши мумкин. Бунда харид тартиб-тамойиллари талабларига кўра тендер бўйича тақдим этилган ҳужжатларни кўриб чиқиш ва расмийлаштириш бўйича белгиланган муддатга амал қилиниши лозим.

86. Тендер ҳужжатларида кўрсатилган мезонлар асосида тендер ғолибини аниқлаш учун харид комиссияси рад этилмаган таклифларни баҳолашни амалга оширади.

Биринчи боскичда тендер иштирокчиси таклифининг техник қисмини баҳолаш амалга оширилади. Харид комиссиясининг тендер таклифининг техник қисмини баҳолаш бўйича қарори баённома билан расмийлаштирилади, баённомада тендернинг биринчи боскичини баҳолаш яқунлари кўрсатилади.

Тендернинг иккинчи босқичи тендернинг биринчи боскичидан ўтган камида икки нафар иштирокчининг таклифлари мавжуд бўлганда ўтказилади.

Тендернинг иккинчи боскичида тендер таклифининг нархга оид қисми очилади ва баҳоланади. Харид комиссиясининг тендер таклифининг нархга оид қисмини баҳолаш бўйича қарори баённома билан расмийлаштирилади, баённомада тендернинг иккинчи босқичи ғолиби аниқланади. Тендерда иштирокчиларнинг нархи бошлангич нархдан юқори бўлган таклифлари харид комиссияси томонидан рад этилади ва баҳоланмайди.

87. Тендер иштирокчисининг ваколатли вакили таклифлар солинган конвертларни очиш тартиб-таомилида иштирок этишга ҳақли.

88. Тендер таклифларини кўриб чиқиш натижалари бўйича:

— биринчи боскичда — агар харид комиссияси барча тендер таклифларни рад этган бўлса ёки фақат битта тендер таклифи тендер ҳужжатлари талабларига мувофиқ келса;

— иккинчи боскичда — агар харид комиссияси барча тендер таклифларини рад этган бўлса, тендер ўтказилмаган деб топилади.

89. Харид қилинаётган товарнинг (ишнинг, хизматнинг) техник хусусиятларидан келиб чиқиб, тендер бир боскичда ўтказилиши мумкин. Бунда корхона бу ҳақда тендер ҳужжатларида кўрсатиши керак. Мазкур ҳолатда тендер таклифининг техник ва нархга оид қисмларини очиш ҳамда баҳолаш бир вақтнинг ўзида амалга оширилади.

Тендер бир боскичда ўтказилганда, агар харид комиссияси барча таклифларни рад этган бўлса ёки фақат битта таклиф тендер ҳужжатлари талабларига мувофиқ келса, тендер ўтказилмаган деб топилади.

90. Тендер ҳужжатларида ва тендер таклифида кўрсатилган мезонлар асосида шартномани бажаришнинг энг яхши шартларини таклиф қилган тендер иштирокчиси ғолиб деб топилади.

Тендер ҳужжатларида ва тендер таклифида кўрсатилган мезонларга мувофиқ

голибнинг таклифидан кейинги энг мақбул таклифни тақдим этган деб топилган иштирокчи харид комиссиясининг қарори билан захирадаги голиб деб белгиланиши мумкин.

Агар тендер ҳужжатларида тендернинг ҳар бир товари (иши, хизмати) хариднинг алоҳида бирлиги сифатида кўриб чиқилиши назарда тутилган бўлса, харид комиссияси голибни тендернинг ҳар бир предмети бўйича аниқлайди.

91. Тендер ҳужжатларида ва тендер таклифида кўрсатилган мезонлар асосида шартномани бажаришнинг энг яхши шартларини таклиф қилган тендер иштирокчиси голиб деб топилади.

Тендер ҳужжатларида ва тендер таклифида кўрсатилган мезонларга мувофиқ голибнинг таклифидан кейинги энг мақбул таклифни тақдим этган деб топилган иштирокчи харид комиссиясининг қарори билан захирадаги голиб деб белгиланиши мумкин.

Агар тендер ҳужжатларида тендернинг ҳар бир товари (иши, хизмати) хариднинг алоҳида бирлиги сифатида кўриб чиқилиши назарда тутилган бўлса, харид комиссияси голибни тендернинг ҳар бир предмети бўйича аниқлайди.

92. Тендер таклифларини кўриб чиқиш ва баҳолаш натижалари тендер таклифларини кўриб чиқиш ҳамда баҳолаш баённомасида қайд этилади.

Тендер таклифларини кўриб чиқиш ва баҳолаш баённомасида қуйидаги ахборот бўлиши керак:

— тендер таклифлари кўриб чиқиладиган ҳамда баҳоланадиган сана ва вақт тўғрисидаги;

— ҳозир бўлган харид комиссияси аъзоларининг ва тендер иштирокчилари ваколатли вакилларининг таркиби ҳақидаги;

— тендер таклифлари кўриб чиқилган тендер иштирокчилари тўғрисидаги;

— тендер таклифлари уларни рад этишнинг аниқ сабаблари кўрсатилган ҳолда рад этилган тендер иштирокчилари ҳақидаги;

— тендер голиби тўғрисида қабул қилинган қарор ҳақидаги;

— тендер голибининг номи (юридик шахс учун), фамилияси, исми, отасининг исми (жисмоний шахс учун), турган жойи (почта манзили).

93. Тендер босқичларида таклифларни кўриб чиқиш ва баҳолаш баённомаси харид комиссиясининг ҳозир бўлган барча аъзолари томонидан имзоланади ҳамда ундан олинган кўчирма баённома имзоланган кундан эътиборан уч иш куни ичида харидларнинг электрон тизимида эълон қилинади.

Тендернинг исталган иштирокчиси таклифларни кўриб чиқиш ва баҳолаш баённомаси эълон қилинганидан кейин корхонага тендер натижалари бўйича тушунтиришларни тақдим этиш тўғрисида сўров юборишга ҳақли. Корхона бундай сўров келиб тушган санадан эътиборан уч иш куни ичида тендер иштирокчисига тегишли тушунтиришларни тақдим этади.

94. Корхона ва харид комиссияси тендер таклифларини қабул қилиш тугайдиган пайтга қадар уларни муҳокама қилишга ҳақли эмас.

95. Тендер натижалари бўйича шартнома тендер ҳужжатларида ва шартнома тузилаётган тендер иштирокчиси томонидан берилган тендер таклифида кўрсатилган шартлар асосида тузилади.

Голиб шартнома тузишдан бош тортган тақдирда унга зақалат суммаси қайтариб

берилмайди. Агар харид комиссияси томонидан захирадаги ғолиб аниқланган бўлса, шартнома тузиш ва унга доир мажбуриятларни бажариш ҳуқуқи захирадаги ғолибга ўтади. Бунда захирадаги ғолиб ғолиб томонидан таклиф этилган нархда (бундан захирадаги ғолиб таклиф этган нарх ғолиб томонидан таклиф этилган нархдан паст бўлган ҳоллар мустасно) шартнома тузади ёки шартнома тузишдан бош тортиши мумкин. Агар харид комиссияси томонидан захирадаги ғолиб аниқланмаган бўлса ёки захирадаги ғолиб шартнома тузишдан бош тортса, корхона янги тендер ўтказади.

96. Тендер натижалари бўйича тузилган шартнома тўғрисидаги ахборот корхона томонидан махсус ахборот порталига у тузилган санадан бошлаб уч иш кунидан кечиктирмай жойлаштирилади.

VIII. Тўғридан-тўғри шартномалар бўйича амалга ошириладиган харидлар

97. Тўғридан-тўғри шартномалар бўйича харидлар қуйидаги ҳолларда амалга оширилиши мумкин:

— Ягона етказиб берувчилар реестрига киритилган ягона етказиб берувчи билан харидни амалга ошириш учун рухсат этилган товарларнинг (ишларнинг, хизматларнинг) хариди;

— Ўзбекистон Республикаси Президентининг фармонлари ва қарорлари, Ўзбекистон Республикаси Вазирлар Маҳкамасининг қарорлари асосида тўғридан-тўғри шартномалар бўйича амалга ошириладиган товарнинг (ишнинг, хизматнинг) хариди;

— фавқулодда ҳолатларни бартараф этиш мақсадида Ўзбекистон Республикасининг эҳтиёжларини таъминлаш учун зарур бўлган товарларнинг (ишларнинг, хизматларнинг) хариди;

— суд муҳокамасида иштирок этиш учун адвокатни (вакилни) тайинлаш билан боғлиқ бўлган харид;

— илм-фан, адабиёт ва санъат асарлари, ижролар, фонограммалар, эфир ёки кабель орқали кўрсатув ёхуд эшиттириш берувчи ташкилотларнинг кўрсатувлари ёки эшиттиришлари каби интеллектуал фаолият натижаларининг мазкур интеллектуал мулк объектларига нисбатан мутлақ ҳуқуққа эга бўлган ягона шахсдан харид;

— нархи (тарифи) давлат томонидан тартибга солинадиган товарларнинг (ишларнинг, хизматларнинг) хариди.

98. Тўғридан-тўғри шартномалар тузилганлиги тўғрисидаги ахборот шартнома тузилган пайтдан эътиборан уч иш кун ичида махсус ахборот порталига жойлаштириши шарт.

Тўғридан-тўғри шартномалар тузилганлиги тўғрисидаги ахборот махсус ахборот порталига жойлаштирилмаган бўлса, ушбу шартномалар бўйича тўловлар амалга оширилмайди.

99. Ушбу бандда назарда тутилган харидларни амалга ошириш чоғида харидларнинг бошқа рақобатли турларидан ҳам қонунчилик талабларига мувофиқ фойдаланилиши мумкин.

100. Агар Ўзбекистон Республикаси Президентининг фармонлари ва қарорларида, шунингдек Ўзбекистон Республикаси Вазирлар Маҳкамасининг қарорларида товарнинг (ишнинг, хизматнинг) харидини тўғридан-тўғри шартнома асосида амалга оширишга рухсат берилса, шартнома ва шартномага оид қўшимча келишувлар Комплекс экспертиза қилиш марказида комплекс экспертизадан ўтказилиши лозим, бундан қонунчиликда белгиланган ҳоллар мустасно.

101. Ягона етказиб берувчидан товар (иш, хизмат) хариди зарур бўлган тақдирда,

етказиб берувчи ҳамда корхона ўртасида тўғридан-тўғри шартнома тузилади ва бу шартнома тўғрисидаги ахборот у тузилган пайдан эътиборан уч иш куни ичида махсус ахборот порталига жойлаштирилиши лозим.

102. Ягона етказиб берувчидан харид куйидаги алохида ҳолларда амалга оширилади:

— бозорда муқобиллари бўлмаган ва фақат ягона етказиб берувчидан олиш мумкин бўлган техник жиҳатдан мураккаб товарларнинг (ишларнинг, хизматларнинг) хариди;

— маданий қимматликлар хариди;

— Ўзбекистон Республикаси Президентининг фармонлари ва қарорларида ёки Ўзбекистон Республикаси Вазирлар Маҳкамасининг қарорларида ягона етказиб берувчи сифатида белгиланган субъектлардан харидлар;

— табиий монополия субъекти товарларининг (ишларининг, хизматларининг) хариди;

— ўз ваколатларига мувофиқ фақат давлат ҳокимияти ва бошқаруви органлари ёки уларнинг тасарруфидаги давлат муассасалари ва ташкилотлар томонидан амалга оширилиши мумкин бўлган ишлар ёки кўрсатилиши мумкин бўлган хизматлар хариди.

IX. Шартномаларнинг ягона реестри

103. Ўзбекистон Республикаси Молия вазирлиги давлат харидлари электрон тизимларининг ва махсус ахборот порталининг ахборотлар базалари ўртасида ахборот алмашиш орқали Шартномаларнинг ягона реестрини юритади.

104. Шартномаларнинг ягона реестрига куйидаги ҳужжатлар ва ахборот киритилади:

— корхона номи;

— молиялаштириш манбаси;

— ижрочини аниқлаш усули;

— харид натижалари сарҳисоб қилинадиган сана ва шартнома тузиш асосларини тасдиқловчи ҳужжатнинг реквизитлари;

— шартнома тузилган сана;

— товарнинг (ишнинг, хизматнинг) номи, шартнома баҳоси ва уни бажариш муддати, товар (иш, хизмат) бирлигининг нархи, у келиб чиққан мамлакатнинг ва ишлаб чиқарувчининг номи;

— ижрочи солиқ тўловчининг номи, фирма номи (агар мавжуд бўлса), жойлашган ери (юримдик шахс учун — почта манзили), фамилияси, исми, отасининг исми (агар мавжуд бўлса), яшаш жойи (жисмоний шахс учун), ижрочининг солиқ тўловчининг идентификация рақами ёки чет эллик шахс учун тегишли чет давлатнинг конунчилигига мувофиқ ижрочининг солиқ тўловчининг идентификация рақами аналог, бенефициар мулкдор тўғрисидаги ахборот, бундан тарихий, бадий ёки ўзгача маданий қимматга эга бўлган ва давлат музей, ахборот-кутубхона, архив фондларини, кино фондларини, фотосуратлар фондларини ва шунга ўхшаш фондларни тўлдириш учун мўлжалланган маданий қимматликларни, шу жумладан музей ашёларини ва музей коллекцияларини, шунингдек ноёб ва қимматбаҳо нашрларни, қўлёзмаларни, архив ҳужжатларини (шу жумладан уларнинг кўчирма нусхаларини) етказиб берувчи бўлган жисмоний шахс тўғрисидаги ахборот мустасно;

— шартноманинг ўзгартирилган шартлари кўрсатилган ҳолда шартномани ўзгартириш тўғрисидаги ахборот;

— шартномани ижро этиш тўғрисидаги ахборот, шу жумладан шартнома учун ҳақ тўлаш, шартномада назарда тутилган мажбуриятларни тегишли тарзда бажармаганлик муносабати билан молиявий санкциялар (жарималар, пенялар) ҳисобланиши тўғрисидаги ахборот;

— бекор қилиш сабаблари ва асослари кўрсатилган ҳолда шартномани бекор қилиш тўғрисидаги ахборот.

105. Шартномаларнинг ягона реестридаги ахборот тўлов ундирилмаган ҳолда танишиб чиқиш учун очиқдир.

106. Қайси шартномалар тўғрисидаги ахборот Шартномаларнинг ягона реестрига киритилмаган бўлса, ўша шартномалар бўйича тўловлар амалга оширилмайди.

IX. Корхона томонидан корпоратив банк карталаридан фойдаланиш тартиби

107. Корхона Ўзбекистон Республикаси ҳудудида фаолият юритиш, шу жумладан давлат божи ва йиғимларни тўлаш билан боғлиқ харажатларни фақат миллий валютадаги корпоратив банк карталаридан фойдаланган ҳолда амалга ошириши мумкин.

Корхонанинг чет эл валютасидаги банк карталаридан Ўзбекистон Республикаси ҳудудидан ташқарида носавдо тусдаги валюта операцияларини амалга ошириш мақсадида фойдаланилиши мумкин.

Корхонанинг корпоратив банк картасига иш ҳақи ва унга тенглаштирилган тўловлар, пенсиялар, нафақалар, стипендиялар ва дивидендларни ўтказишга, шунингдек, корпоратив банк карталари воситасида нақд пул берилиши ва (ёки) чет эл валютасини сотиб олишга йўл қўйилмайди.

Корхона томонидан аукцион савдоларида иштирок этиб, харидларни амалга ошириш учун корпоратив банк картасидан фойдаланиш тақиқланади.

Корпоратив банк карталаридан фойдаланган ҳолда нақд пулсиз шаклда тўлаш учун сарф қилинаётган пул маблағлари корпоратив банк картасининг сакловчисига ҳисобдорлик шarti билан бериладиган, қатъий тарзда белгиланган мақсадларда ишлатиладиган маблағлар бўлиб ҳисобланади.

Корпоратив банк картасининг сакловчиси корпоратив банк картасини ҳисобдорликка олган кундан бошлаб 10 кундан кечиктирмаган ҳолда корпоратив банк карталари воситасида ишлатилган маблағлар тўғрисида Корхонанинг бухгалтериясига ҳисобот тақдим этади.

Хизмат сафарлари билан боғлиқ харажатларни тўлаш учун корпоратив банк картасидан фойдаланганда, корпоратив банк картасининг сакловчиси хизмат сафаридан қайтганидан кейин корпоратив банк картаси воситасида сарфланган суммалар тўғрисида бухгалтерияга ҳисобот тақдим этади.

108. Корхона банк карталари орқали амалга оширилган тўловлар бўйича ҳисобот ҳужжатлари сифатида тўлов терминали квитанцияларининг асл нусхалари, шунингдек, электрон тижорат битимларидаги томонларни идентификациялаш имконини берувчи электрон чеклар, квитанциялар, хабарлар ва бошқа усуллар, инвойс (ҳисоб-фактура) ҳамда қонунчилик ҳужжатларида белгиланган бошқа ҳужжатлар хизмат қилади.

109. Корхонанинг корпоратив картаси орқали фақатгина суммаси бир шартнома бўйича базавий ҳисоблаш миқдорининг эллик баравари миқдоридан кам бўлган харидларга (лойиҳа, қурилиш ва капитал таъмирлаш каби ишлар, хизматлар ва товарлар

бундан мустасно) тўлов амалга оширилиши мумкин. Бунда товарларни сотиб олиш бўйича шошилиш буюртмаларга зарурият туғилганлиги тўғрисида асослангилган ҳолда таркибий тузилмалар томонидан Бошқарув раиси номига хизмат хатини ЭХАТ орқали тайёрлайдилар. Хизмат хатида керакли товарлар рўйхати, товарнинг солиштирма нархи, сотиб олинган жой ва бошқа керакли маълумотлар кўрсатилади.

110. Корпоратив пластик картани зарур маблағ билан тўлдириш учун масъул таркибий тузилма томонидан корхонанинг бошқарув раиси номига зарурий суммани олиш учун хизмат хати тайёрланади.

ХII. Инсофсиз ижрочиларнинг ягона реестри

111. Инсофсиз ижрочиларнинг ягона реестри Ўзбекистон Республикаси Молия вазирлиги томонидан шакллантириладиган рўйхатдан иборат бўлиб, унга қуйидаги маълумотлар киритилади:

— харид якуналари бўйича белгиланган шартлар асосида корхона билан шартнома тузишни ва харидларни амалга оширишни рад этган ёки бошқача усулда бўйин товлаган харид ҳолилари тўғрисидаги;

— мажбуриятларни бажармаганликда ёхуд тегишли тарзда бажармаганликда белгиланган тартибда айбдор деб топилган ижрочилар ҳақидаги, бундан мажбуриятлар

бартараф этиб бўлмайдиган кучлар оқибатида бажарилмаган ёки тегишли тарзда бажарилмаган ҳоллар мустасно;

— харидлар жараёнида ёлгон ёки сохта ҳужжатларни тақдим этган, айти битта лотда иштирок этган аффилиланган шахслар ёки манфаатлар тўқнашуви тўғрисида маълумотларни очиб бермаган иштирокчилар тўғрисидаги;

— суднинг қарорига кўра фирибгарлик, сохталаштириш ва коррупция билан боғлиқ жиноятларни содир этганликда айбдор деб топилган ижрочилар тўғрисидаги.

Бундан ташқари, Корхонанинг Комплаенс хизмати томонидан солиқ органлари томонидан инсофсиз корхоналар деб топилган корхоналар тўғрисида алоҳида рўйхат ҳам шакллантирилиши мумкин. Ушбу рўйхатга тушган корхоналар билан шартнома тузилишига йўл қўйилмайди, ҳамда бу рўйхат Корхонанинг ички коммуникация воситалари орқали барча ходимлар таништирилиши л

112. Инсофсиз ижрочиларнинг ягона реестрига киритилган ижрочининг икки йил давомида харидларда иштирок этиши мумкин эмас, бу муддат тугаганидан кейин ижрочи Инсофсиз ижрочиларнинг ягона реестридан чиқарилган ҳисобланади.

113. Ижрочилар Инсофсиз ижрочиларнинг ягона реестрига киритиш тўғрисидаги қарор устидан суд тартибда шикоят қилишга ҳақли.